

SANITÉ: Le dotur Eduard Agreiter é demez dai 21 ai 25 de setëmbër y vëgn sostituì dala doturia Grete Mählknecht 349 06 67 034.

LÎTES DE COMUN

Düc é bel invia ala presentaziun dla Lista da San Martin en lönesc, ai 14 de setëmbër, dales 20.00, tl gran salf.

En domënia, 20 de setëmbër y lönesc, 21 de setëmbër, é da jí a lité (lites de comun y referendum dl stat). Chirisse bele sëgn la cherta da lité. Sc'i ne la ciafëis nia plü o sc'ara é bele timbrada deplëgn, podëise passé l'edema dan les lites te Comun tratan les ores d'ofize a se lascé fá na cherta nöia.

PLOANIES SAN MARTIN Y LUNGIARÜ

Festa dl'Alzada dla Crusc: dales 7.30 prozesciun da S. Linert sö La Crusc, dales 9.30 Santa Mëssa, dedò ores d'adoraziun por vocaziuns y dales 15.00 benedisciun y concluiun.

La Uniun di Èi dla Val Badia (Kmb) inviëia düc i èi y i jogh l'ater vëndres, ai 25 de setëmbër, dales 19.30, tla dlijia de Badia a tò pert ala prozesciun cun linternes y ciandëres da San Linert sö Oies.

SAN MARTIN

En lönesc, ai 14 de setëmbër, vëgnel invié les scolares y i scholars dles scores elementara y mesana y les studëntes y i studënc dles scores altes cun i geniturs ala mëssa de scomenciamënt dl ann de scora por perié le Spirit Sant do n bun ann de formaziun.

Te cortina é gnü metü man i laurs por la realisaziun de posc por la conservaziun dles urnes de porsones defuntes che ne vëgn nia sopolides te na fossa te tera. Le Comun fistidiëia por l'organisaziun di laurs y ince por paie les spëises. Dër bel dilan.

Canche i laurs sará rová, gnarál metü jö le regolamënt por l'anuzamënt.

LUNGIARÜ

Bel dilan dles ofertes en recordanza dla defunta Roslinda Deiaco fates por la dlijia da pert de Clara Linert, dla fam. Pezzei Franco cun sorus y dl Cor de dlijia.

Le consëi de cöra oress ti sporje les condolianzes plü sintides ai familiars dla def. Roslinda ch'i orun recordé te nostes oraziuns por le gran sorvisc da lavé y tigní nêtes tovaies y guanc de dlijia, n laur ch'ara fajô cun gran maestria y lezitënza.

La Portina por l'assistënza y la cura mët a jí na incuntada por chi che so-codesc a ciasa porsones vedles y/o amarades - ciarede tl'ultima plata.



Plata dles Ploanies San Martin y Lungiarü



siur ploan Klaus Sottas 344 15 54 055 - klsottas@rolmail.net
siur curat Heinrich Perathoner 339 65 74 213
redaziun: anton.gasser@rolmail.net - 348 27 44 517 / 0474 523 194

www.valbadiaonline.it/comunitè

13.09 - 20.09.20 nr. 42

24^a DOMËNIA IA POR L'ANN - A

Vangele do Matí 18,21-35

Pire ti ê jü pormez a Gejü y l'à damanè: Signur, tan gonot mëssi pa ti pordenè a mi fre, sc'al fej picé cuntra mè? Set iadi?
Gejü ti à dit: Nia set iadi, mo setantesset iadi.
Cun le rëgn dl cil éra sciöche cun n re che orô fá cunt cun sü sorvidus.
Canch'al à metü man da fá cunt, ti n'àn condüt un che ti ê diescmile talënc de debit. Deach'al ne sciafiâ nia da rete i scioldi,
à le patrun comanè de le vëne cun fomena
y mituns y cun döt ci ch'al à,
por le fá despaie jö insciö le debit.
Dailò s'à le sorvidù sciurè söi jenëdli
y periâ: Ais paziënza cun mè!
I te reti döt. Le patrun à albü compasciun cun le sorvidù,
l'à lascé jì y ti à lascé do le debit....



*Danter mituns y geniturs, danter fredesc y sorus, danter vijins y compagns de laur sozedel tres indò ch'an se fej un al ater val' de tort o ch'an s'ofënn.
Raporc roviná de chi ch'an resta ince instësc de colpa.
Por dōta la vita pōn s'un avëi impormal y avëi val' da se trá dant un al ater.
Mo an ne mëss nia soghé chësc jüch da ne zede nia cina ala fin,
an pó ince lascé y taié ia y ciafé insciö y se gode na liberté nöia.*

*Le vangele da incö nes dëida te chësc vers:
"al ti á lascé do le debit."*

*Mëte man danü y lascé do á da nen fá val' cun scinché y lascé ia.
Implü baia le vangele de paziënza y de misericordia.
I ó mëte man danü en chësta edema.
Rumpí ia la morona dla stlavitü, scincan y lascian ia,
y vire te na generosité y liberté nöia che nes fej dessigü sté damí. (C.R.)*

EDEMA LITURGICA	SAN MARTIN	LUNGIARÜ	
13.09.20 24ª DOMËNIA - ann A	9.00 Corona 9.30 Gran Mëssa por la Comunità y benedisciun dl tëmp + siur Heinrich Videsott	7.55 Corona 8.15 Gran Mëssa por la Comunità y benedisciun dl tëmp	
14.09.20 Lönesc <i>Festa dl'Alzada dla Crusc </i>	18.00 Mëssa en onur dl Spirit Sant por les scolares y i scolars dles scores elementara y mesana y por les studëntes y i studënc dles scores altes cun i geniturs por perié do n bun an de scora y do l'acompagnamënt dl Spirit Sant		
15.09.20 Dedolönesc <i>Maria Adolorada, Dolores</i>	19.30 Mëssa + Vijo Clara (dl ann) vis y def. dla fam. Paula Moling Zingerle		
16.09.20 Dedemesaledema <i>Cornel y Cyprian, Iulia, Edit</i>		7.30 Mëssa + + Pire y Angela Dapoz (dl ann)	
17.09.20 Jöbia <i>Hildegard da Bingen, Robert</i>	7.30 Mëssa por les püres animes + Sepl Trebo, Pension Tor Corona por vocaziuns		
18.09.20 Vëndres <i>Lambert, Ariana</i>	19.00 Adoraziun chîta 19.30 Adoraziun deboriada	7.30 Mëssa por i defunc de Nazio y Loise Clara	
19.09.20 Sabeda <i>Jenare, Igor, Ferdinand</i>	18.30 Mëssa prefestia por les families de Albert y Rosina Moling + Erna Frenner, Jënder	20.00 Mëssa prefestia por i nüc Manuela y Bruno por i nüc Sofia y David	
20.09.20 25ª DOMËNIA - ann A	9.00 Corona 9.30 Gran Mëssa por la Comunità y benedisciun dl tëmp en onur dl Spirit Sant + Doro Verginer	7.55 Corona 8.15 Gran Mëssa por la Comunità y benedisciun dl tëmp	

14 de setëmber - Alzada dla Crusc

*M'anadái dla crusc sön parëi te stüa
o dl crist dan chël ch'i passi ia?
M'é Gejù sôla crusc
deventé val' tan de normal,
ch'al n'é nia plü por me n ficiun
te mi vire che s'á arjigné ite te chësc monn?
Signur Gejù sôla crusc,
sideste te mia vita n ficiun
che me fej sintí la meseria incër me ia
y tl monn,
sideste te mia soferënza n ficiun
ch'i ne me lasces nia ia y ne la dais nia sô,
mo ch'i confides en te,
tö che te portes dötes les crusc cun nos. M.T.*

Bel Dî, benedëscesse

*y dásse la conescënza de nostes deblëzes.
Benedëscesse
y dasse la comprenjiun dles deblëzes di atri.
Benedëscesse
y dasse la forza da soporté a da pordené.
Benedëscesse
y dasse l'amur che nes condüj düc adöm. T.D.*